



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 7

## Test bowling rankings: Bumrah temaba jenjangi tuogo

## Gaza rara indang jembishinütsü Blinken Israel nung lir

VOL. XXI ISSUE NO. 116 (ADOK 116) DIMAPUR ANGTEPNÜ (THURSDAY) TSÜKLAI (FEBRUARY) 08, 2024 ₹ 5.00

### 14 buba NLA indang session pezübuba jazüker

**Kohima, February 7, 2024 (DIPR):** Nagaland Governor La. Ganesan-i 14 buba Nagaland Legislative Assembly indang pezübuba Session agitsü osang metetdaksüogo.

February 26, 2024 anepdang 9:30 ako nung 14 buba NLA indang pezübuba session tenzüksü ta Nagaland Governor-i sangdong ka nung metetdaksüogo.

### ANCSU aser DNSU-i kaketshir züka merenshiba aitsür

**Dimapur, February 7, 2024 (TYO):** January 29, 2024 nü police-i Tetso College nung azünger Moalong Jamir dak züka merenshiba atema tebilemetsü abener aser iba inyakyim aitsür ta All Nagaland College Students Union (ANCSU) aser Dimapur Naga Students Union (DNSU) teloktemi metetdaksüogo.

President Tenyesinlo Bukh aser General Secretary Arhonthung M Lotha nati sangdong ka nung ashi.

Anti Vehicle Thief Squat (AVTS)-i Tetso College nung azünger arishi küm 19 tain Moalong Jamir züka merenshiba atema temulung raksar ta ANCSU-ia metetdaksüogo.

"Police on duty" ajanga iba amai tim masüba inyakba aser tai maketba kaketshir ka dang asüngdangya mesüi tashiyim inyakba ya kanga metongi inyakba mapa ka lir ta ANCSU-i ashi.

Bangdakpurtemi tashiyim inyakba AVTS police dak ozünger agi melaba mapa inyaksü akhanger, yamaji mesüra nübortemi ozünger amertem dak temulung malemetsü aser tamang makatsü ta DNSU-isa ashi.

"Ozü kaketshir Moalong Jamir pusema nungiter aser temeten anguba den yakta taneptsü angutsü moatsür" ta President Moayanger Jamir aser General Secretary Sedelo D Vadeo nati sangdong ka nung ashi.

### Meitei Leepun-i NRC aser ST list atema akhanger

**Imphal, February 7, 2024 (Agencies):** Manipur nung Meitei Leepun-i National Register of Citizens (NRC) mapa tenzüksü aser Scheduled Tribe list nungi ozünger alema arurtem agientsü takhangba agütsüogo.

Modi, Home Minister Amit Shah, ozü Chief Minister N. Biren Singh nungeri state kümzüka ayutsü aser longjemtsü bendanga agüja inyakba atema tenüng asanger. Parnoki asen arrtsütem kümzüka ayutsü mapa inyakba ajanga Manipur nung arjungsü atema tenangzük agia inyakba sayur. Sorkari kilometre 163 Indo-Myanmar arrtsü ajanga atsü dangtsü lemteba asoshi pelar" ta pamokisa metetdaksü.

Manipur nung nübortemi kechi tia ajurutsü ta asüba tensa ka nung Meitei Leepun-i Centre lenisüba nem tenüngsang agütsür ta Meitei Leepun-i sangdong ka nung ashi.

"Prime Minister Narendra

### Assam nung Hindu teloktemi Khristan school tem dang tuyur

**Guwahati, February 7, 2024 (Agencies):** Bodbarnü Hindu (Sanatani) teloktemi Assam nung Christian Missionary tem dang parnoki lapoka aliba school tem dang Yisu aser Mary kürakyanglutem agientsü tetuyuba agütsüogo.

kechi inyaksü'ar mashitsü. Arishi küm 10 tain tanur kati school campus nung Jai Sriram meshittra, kodaser parnoki school campus nung Yisu aser Mary indang sayutsünger" ta pai ashi.

Hindu kaketshirtemia school assembly nung Khristan sarasadem asür anungji iba sarasadem masütsüla ta pamokisa metetdaksüogo.

"Onoki school tem nung fathers, sisters aser brothers-i tamangba yimsü süoshitem magitsü shiogo. Parnoki normal clothes asemtsüla. Parnoki school complex nungi Yisu, Mary aser Kangki süngyanglutem agientsüla. Pamokisa school complex nungi tenla kitem aser sarasadem agientsüla" ta Borah-isa ashi.

"Christian Missionary temi school aser shisaliok rejutem tamangba rejutem kümdaksür. Onoki ibaji memelatsü. Onoki parnok anogi 10 nungi 15 shi ka repranga atatsü aser iba sülen kechi teinyaktsü lir inyaktsü" ta Kutumba Surakshya Parishad president Satya Ranjan Boraah-i ashi.

"Onoki metoktsütsü. Onoki

"Onoki ashiba ama meinyakra, onoki kechi inyaksü'ar inyaktsü. Shiasaliok rejutem tamangba yimsü rejutem kümdaksüba onoki magizüker. Onoki nungdakra Supreme Court dangi aotsü" ta paisa shisem.

### Northeast nung tetsürtem tashi itta lir; langka tasen kar shisatetsüla



**Kohima, February 7, 2024 (TYO):** North East India nung tetsürtem tashi itta lir anungji nenoki tourism sector dena langa tasen ka atema shisadangang ta National Commission for Women (NCW) Chairperson Rekha Sharma-i ashi.

Amazing NAMASTE Foundation ajanga ayongzükba 'Women on Wheels' Season 2 nung shilem agirtemi War Cemetery semdangand Rekha Sharma-i osangbener den jembi. Lai North East-i kanga arunür kechiyong idaki alirtemi temeim aser akhümtsübu kanga lemsateper ta ashi.

"Northeast nung tetsürtemi mapa tajung aika inyaker saka nenoki langka tasen ka atema bilemetsüla. Iba nung tourism sector dak sendakba shishilembatsü dena lir" ta lai ashi.

"Tesüiba mapangtem nunga North East nung tetsürtem tashi itta dang liasü aser tanüa temelenshi tajung aika aliba ajanga tashi itshio. Northeast

nung tetsür aika government sectors nung inyaker, shishilembar aser Kohima ama tesem tila nunga tetsürtemi mapa tajung aika inyaker" ta Sharma-isa metetdaksü.

"Ni NCW nung küm 9 jungnüa inyaker aser küm tenet tejakdang Nagaland semdanga liasü. Tesüiba aser tang medemdangra North East aser India nung tetsürtem jenjang kanga melenshiogo" ta laisa ashi.

Tanü tetsürtem temelenshi bener arurtem lir aser loktiliba nung asenok temelenshi adokertem lir. Entrepreneurship, start-ups, business, army, companies nung CEO mesüra homemaker lilr ta laisa ashi.

Tetsürtemi kidang mener langka tasen ka angazüktsü meranger kechiyong lokti tangatetba melenshiogo aser Centre sorkari teyari agütsür ta Sharma-isa ashi.

"Prime Minister-i Lal Kila nungi Independence Day nung tetsürtemi anir tashi itdaksüba

indang jembidang inyakyim melenshir aser tesüiba küm 9 tsüngda asenoki temelenshi tajung aika nguogo" ta laisa metetdaksü.

Tetsürtem dak tashiyim mapa kanga inyaker ta nisungtemi ashir aser iba ya data teimba akümba ajanga lir. Tangbo FIR tem benoker aser police-ia tesüiba dang nungi tang tajungba inyaker, ta Sharma-isa ashi.

"Langka ka atalokba miimbangra aser ozünger alema inyakba mali ta shira, ibaji majung. Anungji onoki miimbanga mayur aser yimjak nung metetdaksür, iba jaji tetsürtem dak tashiyim inyakba data teimba akümer" ta lai ashi.

Züngsem 27 agi akümba WoW team ya Nagaland State Commission for Women-i anepalua mongdaksü aser tanep Assam-i maodang Kohima War Cemetery semdanga liasü.

NCW chairperson Rekha Sharma-ia parnok den Medziphema tashi shilem agia aden.

### Nagaland-i küm 2 tsüngda Assam ali 28 ben atsünga agitsü merang

**Guwahati, February 7, 2024 (Agencies):** Tesüiba küm ana tsüngda Nagaland tsütsü nungi Assam li 28 ben tashi atsünga agitsü merang ta Assam Border Protection and Development Minister Atul Bora-i ashi.

ya Nagaland kübok adener ta shia ki kar raksatsü. Iba tatalokba sülen SDPO Maibong aser Acting Magistrate na tesem tonga ao aser tensa azüok, ta Minister Bora-isa ashi.

Tang tagidak Assam Assembly budget session nung Leader of Opposition Debabarata Saikia-i asüngdangba langzüdang Bora-i iba osang metetdaksü.

Nagaland den arrtsüa aliba Karbi Anglong district nunga tesüiba küm ana tsüngda Nagaland tsütsü nungi 21 ben tashi Assam ali atsünga agitsü merang. Ajisüka item tatalokba ajak meteta ayu aser eviction drives ajanga ali meyipa agi, ta paisa ashi.

2022 aser 2023 nung Nagaland tsütsü nungi Assam ali aiben atsünga agiogo. Sivasagar district kübok Ougurijan Grant village nung asemben tashi atsünga agitsü merang, ajisüka ibaji noktang ta pai ashi.

Tesüiba küm ana tsüngda Jorhat district nunga Nagaland tsütsü nungi anaben tashi ali atsünga agitsü merang. Tatalokba anaprongji ashishitep aketba Disoi Valley nung atalok aser mezünger January 1, 2023 nung atalok. Idangji nisung kari Disoi Valley nung reserved forest Compartment No 15 nung süngdong 97 tsüngdok. Tanabubaji February 10, 2023 nung atalok aser idangji Compartment No 15 nung ozünger memelaba saw mill ka aser lenmang yanglu.

Maneni, Sivasagar district kübok Smithpur nung forest ketdangsürtem, police aser ketdangsürtemi December 10, 2023 nü ali atsünga agiba tesem semdang aser eviction drive agi.

July 29, 2023 nü Nagaland kübok Peren district nungi nisung 40 shi ka Herailo village-ia aru. Iba yimtsünger ya Dima Hasao district kübok lir aser Nagaland nungi aruba telok jaji iba tesem

Protected forest area nung ozünger alema saw mill yangluba atema state anaprong nungi magistrate tem ajurutepa olemteper ajanga angatetteptsü bangjemteper aser Nagaland ketdangsürtemi saw mill jji agien, ta Assam border development minister-isa metetdaksü.

Nagaland sorkari Golaghat district nung arrtsü anasa embankment ka yangluba noktanger ta osangtem prokshibaji tiyazü ta Bora-isa ashi.

Golaghat district kübok Sorupani village nung Water Resource department-i embankment ka yangluba Nagaland sorkari noktanger ta asüba osangji tiyazü. Department-i data agütsüba nung iba tesem nung maparen kecha meinyakba shia lir ta paisa ashi.

Mera aser Jiyo ayongtem nung embankments yangludang Nagaland sorkari noktanger saka District magistrates den police aser central forces shilem agia ken o tem angatettepogo. Ibal mesükba mataloktsü atema tenük yokdar, ta Minister Bora-isa ashi.



# Advisor Kazheto-i Wokha district sema jajar



**Dimapur, Tsüklai/February 07 (TYO):** Advisor, Animal Husbandry & Veterinary Services aser Wokha District indang BJP Legislator Incharge, Kazheto Kinimi-i Wokha district sema jajaba sentong Bodhbarnü tenzükogo.

Wokha District BJP Unit office nung iba tour tenzükba sentong ka agidang Advisor Kazheto-i Wokha District karyakartas tem dang yariteptsü ayongzük aser paisa Ato Kilonser Narendra Modi-i takok balala anguba indanga lemsatepa liasü.

Government of India indang flagship schemes ajunga akok tashi nisung ajak atongtsüla aser iba atema awareness agütsütsüla.

Pai karyakarta tem dang pei sasa pei dak temulung lema malitsü aser nüburttem aser party ajungtsü asoshi meranga inyaktüsü ashi.

Advisor Kazheto-i State BJP President Benjamin Yepthomi aser BLP Leader & Deputy CM Yanthungo Patton lenisüba kübok party tashi itshitsü ayongzük aser Ato Kilonser Narendra Modi lenisüba kübok Centre nung maneni BJP-i sorkar kumtetsü, ta ashi aser Lok Sabha elections nung PDA ajanga shimba candidate yaritsü ayongzükua liasü.

Chief Spokesperson BJP Nagaland aser Wokha District Incharge, Thomas Magh-i karyakartas tem dang temulung

ajak agi bendanga agütsür party tenzüktsü aser PM Modi aser GoI mapa tajung maneni tejakleni bener aotsü ayongzük.

Asenok asoshi tongtipangtiba mapaji nüburt aser linük tenzüktsü ya lir, anungji party sapang nungi nüburttem ochishia tenzüktsüla, ta pai ashi.

Iba sentong nung menden Wokha District BJP general secretary Longshithung Kithan liasü aser VitoHo Swu, Pastor, SABAK ajanga Tsüngrem temoatsü jazüka sarasadem.

Maneni Wokha District BJP tir L. Zaremo Kikon-i pela agizükba o jembia, Sojano Tsopoe-i temeja ken ka aten aser Elithung Ovung, District Vice President ajanga melepzüing o jembia liasü.

# ASU-i power supply shidak agütsütsü akhanger

**Dimapur, Tsüklai/February 07 (TYO):** Power supply shidak magütsütetba tejashi nung Angami Students' Union ajanga Executive Engineer, Department of Power, Kohima Division nem tezüluba ka agütsüba nung Kohima district ajunga nung

talisa tatidang mapang power supply shidak agütsütsü asoshi ghonda 48 agütsüogo.

Department of Power ya kaketshir asoshi tezüdangtsü department ka kumogo, kechiaser tongtipang tatidang, talisa HSLC aser HSSLC mapang power supply shidak

magütsüteter, ta ASU ajanga ashi.

Onoki akhangba ama meinyaktetra yimya balala nungi lenmang bushitsü, anungji ghonda 48 tsüngta onoki khuret abenba bentettsü akhanger, ta ASU ajanga ashi.

# Lok Sabha atema aruya aliba general Tuensang DPDB senden menogo



Deputy Commissioner, Lithrongla Tongpi Rutsa & Vice Chairman DPDB Tuensang ajanga DPDB senden nung jempiba noksa nung angur.

**Dimapur, Tsüklai/February 07 (TYO):** Tuensang indang District Planning and Development Board pur ita shia amenba senden February 7, 2023 nü DC Conference Hall, Tuensang nung mena liasü.

Iba senden ya Deputy Commissioner & DPDB Tuensang vice chairman Lithrongla Tongpi Rutsa lenisüba kübok mena liasü.

Republic Day nung kanga jungashilem agiba atema

DPDB Tuensang vice chairman Lithrongla Tongpi Rutsa-i department ajak dang pelaba lemsatepa liasü.

Taoba ita amenba senden nung lemtetba pangzüing lepa reprangshiba sülen parnoki District Hospital Tuensang nung District Disability Rehabilitation Centre (DDRC) amenoktsü indang jembia agizükua liasü.

DDRC ya Ministry of Social Justice and Empowerment, Government of India kübok lir

aser ibai district nung lemtamatar yaritsü asoshi lir aser Nagaland nung ibai centre tanabuba alitsü, ta Dr. Senilo Magh MO, District Hospital Tuensang ajanga ashi.

Iba sentong nung District Fishery Department ajanga PowerPoint presentation agüja liasü aser taruba senden nung Department of Agriculture ajanga par department inyakyim indang osang agütsütsü nungloktsü.

# DC & DEO Kohima ajanga EVM/VVPATs indang awareness ayongzüktsü

**Dimapur, Tsüklai/February 07 (TYO):** SVEEP inyakyim dak sendakba nung aser aruya aliba Lok Sabha elections 2024 nung EVM/VVPATs amshitsü atema Mobile Demonstration Van ka tenzükba sentong Office of the Deputy Commissioner & District Election Officer Kohima ajanga ayongzüktsü, ta Deputy

Commissioner & District Election Officer, Kumar Ramnikant IAS ajanga sangdong ka nung ashi.

Iba sentong ya February 8, 2024 anüingdang 11:00 ako nungi tenzükba Deputy Commissioner & District Election Officer Kohima indang Office Entrance nung agitsü, ta sangdong ajanga ashi.

# NHHDC ajanga Kohima nung State Handloom Expo ayongzüktsü

**Dimapur, Tsüklai/February 07 (TYO):** Nagaland Handloom & Handicrafts Development Corporation Ltd. (A Govt. of Nagaland Undertaking) Dimapur ajanga Kohima Village ground, Kohima nung March 5, 2024 nungi March 18, 2024 tashi State Handloom Expo ayongzüktsü, ta sangdong ka ajanga ashi.

jangra aliba Co-operative societies, Producer companies, SHGs, Federations, Apex Societies aser silk weavers, Jute Artisans aser KVIC densema Handloom & Handicrafts agencies temi Project Cell, NHHDC Ltd, Half Nagarjan, Dimapur nem application agütsütsüla.

Iba Expo nung shilem agitsü asoshi application ya February 26, 2024 tashinung agütsütsüla. Iba Expo ya Office of the Development Commissioner (Handloom), Ministry of Textiles, Govt. of India, New Delhi ajanga sponsor asür.

Application nungya address tejangja den mobile number, Bank account den IFSC code dener office mapang shia aliba anogo matongdang agütsütsüla, ta sangdong ajanga ashi.

Expo nung shilem agitsü

Stall ajanga angati agütsütsü aser NHDP guidelines nung aliba ama lumpsum TA/DA aser freight charges agütsütsü.

# Home Department-i computer advance atema teyari agütsütsü

**Dimapur, Tsüklai/February 07 (TYO):** Home Department Loan Branch ajanga state sorkar mapa inyaker ajak dang sangdong ka nung ashiba agi, 2024 atema computer advance teyari asoshi application ya

February 6, 2024 nungi tenzükba agütsütsü.

Application ya February 20, 2024 tashi agizüktsü aser iba sülenbo application kata magizüktsü, ta sangdong ajanga ashi.

# Assam Rifles temi sentong balala ayongzük

**Dimapur, Tsüklai/February 07 (TYO):** NCC Cadets tem Armed Forces nung adentsü ajungmesoa Assam Rifles temi Jotsoma Science College, Kohima nung February 5, 2024 nü 'motivational lecture cum interactive session' ka ayongzükua liasü.

Indian Military Academy semdanga yangji aliba cadets aser officers tem den ajurutepa sensaksema liasü.

Iba sentong nung NCC Cadets 150 den tesayur trok aser Asst. NCC Officer (ANO) dena liasü. Iba sentong nung Armed Forces atema application agütsüba, shimba yimya, training aser takum yimya balala indang jembia liasü.

Nüburttem mulungjang nung temulung lemtetdaksütsü mechi Assam Rifles temi Tening Town, Peren district nung February 6, 2024 nü Security Meet ka ayongzükua liasü.

IGAR (N)/ HQ 5 Sector AR kübok Assam Rifles temi Kohima College, Kohima Science College, Sazolie College aser Oriental College nungi kaketshir 20 atema National Integration Tour ka February 03, 2024 nü Kohima nung tenzükja liasü.

Iba senden nung GBs 15, village council züingsem 17, lokti tentet balala aser Police Station Tening nungi teshimtet nisungtem dena liasü.

February 6, 2024 nü parnoki Forest Research Institute of India (FRI), Dehradun semanga liasü aser Uttarakhand indang governor ajurua sensaksema liasü.

Tening nung security dak sendakba ken o jembishinütsü atema iba mensem ya mena liasü, kong lendong timtem mataloktsü mechi osangtsüsang lemsateptsü, security forces aser nüburttem tsüngta amalitep akatsü jembia liasü.

Parnoki Maalsi Deer Park semdang aser iba mapang arem shiruru wazüka ayuba yimya balala angazükua liasü.

Civic Action Programme kübok Assam Rifles temi Kiphire district kübok Mutinkhong yimtsüing nung aliba Government Primary School yanglushija liasü. Ita ka jungnüa iba mapa inyakba sülen February 6, 2024 nü iba school ya yimtsüing nem agüja liasü.

Maneni parnoki Rajpur Toad aser Pacific Mall semdanga liasü.

Iba school ya kanga mejungi kumer liasü, saka Assam Rifles temi bendanga agütsür inyaka temelenshi jenti aruogo. Parnoki desks, benches, tables, electric fittings aser kishi-kijiba nungertem yanglushiba den kilem ajunga tasen melenja liasü.

February 7, 2024 nü parnoki



### Congress-i Dalit nunger aser tribal nüburtem anemer: PM Modi



New Delhi, February 07, 2024: Bodhbarnü Ato kilonser, Narendra Modi-i Rajya Sabha senden nung jembidang tangokba noksa nung angur.

**New Delhi, February 07 (Agencies):** Bodhbarnü Rajya Sabha senden nung Congress party aija Ato kilonser Narendra Modi-i, akhidang nungi Congress-i Dalit nungertem, backward classes aser tribal nüburtem anemer, ta metetdaksü.

Congress-i linük tesem ajaklen caste census agitsü akhangba dak sendakba nung Ato kilonseri, iba ama tesempa ajanga tribal tsür ka India Tir asütsüji Congress-i anema liasü, ta ashi.

Paisa BJP-i aniba NDA sorkari dalit nungertem, tribals

asew backward classes atema mapa balala inyaksüba metetdaksü.

"Dalits, backward aser tribal nisungtem atema tanemer tulutibaji Congress lir. Khenkhenbo kü melungjang nung ya asüngdang- Baba Saheb mali asübo SC/ST atema reservation ngur lila asü?," ta Ato kilonseri ashi.

Taoba mapang Ato kilonser asür Jawaharlal Nehru-i taoba mapang Chief Minister tem dangi züluba shidi ka zünga metetdakja Modi-i, "Ni iba shidi nung alibaji oshi meyipzükör azünger - 'Ni

reservation tapu ajak maginer, talisa sorkar mapa nung reservation maginer," ta metetdaksü.

Modi-i, "Ibayongji ni, parnoki (Congress) reservation anemer ta jembir," ta ashi.

Modi-i, "Dalits, SC/STs aser tribals nem reservation agütsüra sorkar mapa 'quality' timtemtsü ta Congress-i bilema liasü," ta ashi.

Congress lenirtemi iba oji anema ayimdenba mapang nung Modi-i, "Nehru-i züluba shidi ni zünga metetdaksüdi aser nenok sasa jangjashiang," ta ashi.

### Uttarakhand Assembly nung Uniform Civil Code Bill agizükogo

**Dehradun, Tsüklai/February 07 (Agencies):** Bodhbarnü Uttarakhand Assembly nung Chief Minister Pushkar, Singh Dhami-i aniba sorkari Uniform Civil Code Bill (UCC) benokba sülen iba bill agizükogo; linük nung Uniform Civil Code mezüng benokba state ji Uttarakhand asütsü.

Uttarakhand Assembly nung opposition-ibo iba bill ya select committee ka nem tama agütsütsü takhangba agüja liasü.

Maneni iba bill ya agizüktsü atema linük Tir nem agütsütsü.

"Iba ozüng ya ajak kasa züngshitsü, ozüng kasa asütsü aser kasa temeden atema lir. Iba Bill nung merajemba aika liasü saka ananü tashi assembly nung iba bill benoka o lemtepa mapang nung ajak

rajemtsüogo," ta Dhami-i ashi.

Assembly tembangba sülen osangbenertem den jembidang Chief Minister Dhami-i, "Iba ozüng ya shinga anema masü. Iba ya loktiliba inyakyim ajanga timtem ajangshir tetsürtem atema lir. Iba ozüng ajanga parnoki (tetsürtem) pei sasa melung lemtepa. Iba ozüng ya tetsürtem lenla ajak nung renloktsü atema lir. Iba bill agizükogo. Onoki Tir dangi yoktsü. Tiri sign asüba sülen onoki tekeraba nung iba ozüng benoktsü," ta metetdaksü.

Bodhbarnep Uttarakhand Assembly nung iba bill benokba mapang nung Dhami-i, iba bill ya linük temzüng nung lateta alibatem nung ajemdaker renem, ta metetdakja liasü.

Paisa, "Linük nüchiso anguba sülen linük temzüng

yanglurtemi mapang tetemsü nung UCC benoktsü atema Arrla 44 ajanga state tem nem tashi agüja liasü. Iba ozüng dak sendakba nung nüburtem terata lir. Linük temzüng nung aliba ama onoki iba ozüng renem," ta metetdaksü.

Lok Sabha election agitsü ita ishika dang lia Uttarakhand nung Uniform Civil Code agizükör.

Union sorkaria iba ama ozüng ya linük jenjang nung benoktsü tebilemba lir. BJP-i yimsüsüba states Gujarat aser Assam-ia peipei state nung UCC agizüktsü atema inyakdar.

2022 küm Uttarakhand nung assembly election atema nüboyimba mapang nung BJP-i state nüburtem dang parnoki takok ngura UCC Bill agizüktsü, ta nangzuka liasü.



February 07, 2024 nü Jantar Mantar, New Delhi nung Karnataka Deputy Chief Minister, DK Shivakumar leniba nung party nung lenirtemi Centre sorkar anema longkak aيتدang tangokba noksa nung angur.

### Delhi Court-i Arvind Kejriwal jaoker

**New Delhi, February 07 (Agencies):** Delhi court kati AAP tongti lenir aser Delhi Chief Minister, Arvind Kejriwal dang February 17 nü court matsüngdangi arung aser Enforcement Directorate (ED)-i ponguben tashi pa jaokyonga kechiba maoar kuli agüjang, ta tuyuogo.

Tamalen Delhi excise policy ochimashi ken o nung ED-i Kejriwal ponguben tashi jaoka liasü saka pai ED matsüngdangi khen danga mao.

Ano külen Bodhbarnü osangbener den jembidang Aam Aadmi Party-i, "Onoki court tetuyubaji shisadangdar aser ozüng kübok onoki tim inyaksü. Onoki court dang (ED)-i jaokbaji kechiba ozüng alema liasür metetdaksütsü," ta ashi.

ED-i, sorkar agency kati tuyubaji ketdangser kati sendoka meyütsütsüla, ta metetdaksü.

Enforcement Directorate-i tesüsabuba Kejriwal jaokbaji February 2 nü liasü.

ED-i taküm January 19, yaküm November 2, December 21 aser January 31 anogotem

nunga Kejriwal jaoka liasü saka pai ED matsüngdangi maoba sülen ED-i Kejriwal anema Delhi court ka nem temepishiba ken o agüja liasü.

AAP-i, ED-i Kejriwal jaokba ya yimtenren tsütsülen nungi lir, iba denji külemi Ato kilonser, Narendra Modi nükjidongji Delhi nung AAP sorkar chirepdaksütsü asoshi Arvind Kejriwal pudaksütsü atema lir, ta tai tongloksür.

Tamalen (yaküm April ita nung) excise policy ken o dak sendakba nung Central Bureau of Investigation (CBI)-i Kejriwal dang ghonda 9 tashi asüngdangyaa liasü. Tang tashi nungbo iba ken o nung pa nem tai tongloksü mali.

Iba mapang nungji Kejriwal-i, "CBI-i tasüngdangba 56 asüngdanga liasü (saka) ajakji tailla. Parnok ket nung kuli ka danga mali, ta ni metetogo," ta metetdakja liasü.

Kasa ken o dak sendakba nung yaküm AAP lenir ana-taoba mapang Delhi Deputy Chief Minister Manish Sisodia aser Rajya Sabha MP, Sanjay Singh nabo puogo.



Mumbai, February 07, 2024: Nisung aseme Kuwait nungi anir aruba rong ka noksa nung angur. Kuwait nungi nisung aseme ozüng alema Mumbai tashi rong nung aruba sülen par asemprongla puogo, ta Bodhbarnü ketdangser kati metetdaksü.

### PM-i pa opposition nung ali ama jembir: MK Stalin

**Chennai, February 07 (Agencies):** Bodhbarnü Tamil Nadu Chief Minister, M K Stalin-i, Ato kilonser Narendra Modi-i opposition oshi jembia pa opposition nung ali ama aser Centre nung ruling party ji Congress ama Congress aitsür, ta ashi.

Bodhbarnü Spain nungi Chennai tonga aruba sülen Stalin-i, pai bendanglen semdangba mapang nung company aikati sen crore 3,440 state nung invest asütsü atema tezüngzüktepa agiogo, aser ibaji ajanga Tamil Nadu nung aliba company tem aser pai aniba sorkar dak tangari melung lemtepa sayur, ta metetdaksü.

Stalin-i, Tamil Nadu ya linük nung industrial sector tsütsü temaba state kümdaksütsü atema Spain semdangba nung kanga tajangzük lir, ta ashi.

Chief Minister-isa, ano investors aikati investment atema Tamil Nadu shimtsü, ta ashi.

Investment atema Tamil Nadu den tezüngzüktepa agiba company tem rongnung German shipping major Hapag-

Lloyd (sen crore 2,500), Spain nung aliba benchmark company- Edibon (sen crore 540) aser Spanish sanitary waremaker Roca (sen crore 400) densema lir, ta metetdaksü.

O s a n g b e n e r t e m i asüngdangba ka langzüdang Stalin-i, "Ato kilonseri Parliament nung jembiba oji ni nguogo, jangratema züngogo aser menüogo. Modi Ato kilonser akümba mapang nungi pai BJP opposition nung ali ama aser Congress ang ruling party ama jembir," ta ashi.

Modi-i, NDA teloktepi Lok Sabha election nung menden 400 dak tema angutsü ta jembiba o dak sendakba nung Stalin-i, NDA-i Lok Sabha menden ajak (543) nung takok angutsü ta pai (Modi) jembia nunga ni kecha mesüngmangtsü, ta ashi.

Stalin-i, "Menden ajak senteper 400 dang na? Constituencies ajak senteper 543 lir aser pai parnoki (BJP/ NDA) menden ajak nungji takok angutsü ta jembia nunga ni kecha mesüngmangtsü," ta ashi.





## TIR YIMYIM YIMOBILEM (EDITORIAL)

DIMAPUR YANGTEPNÜ, FENRUARY (TSÜKLAI) 08, 2024

### Tesayur teimba kin nung asangtsüla

**N**agaland government ta asü dang jet ta ochimashi noksa ya ajak mulungjangi arur. Ibaji Nagaland government nung ochishia inyaker nisung pungo danga lira, parnok asoshibo kanga tesasatsüka aser tezüdangtsüka lir. Iba ama Tsüngrem aser nisung tsüngdang tamakok anguba state ka shia arudaktsüsbaji School Education department nungi tenzüktsüba mapa ka lir, kechiyong nisung nem temetetba dang masü saka pei asoshi dang mebilemi tangar asoshia bilema tajung inyaksü tangatetba agütsüsbaji government kübok department ajak rongnung School Education department ya lir. Aji oda, Education ta aliba department-ji jungra state ajungtsü saka education ta aliba department-ji mejungra tangar department ka nunga shitak meinyaktsü. Iba tangatetba nung School Education department reprangtsü mapa lemzüker rogo yimten yimsüsür aser ketdangsertemi Nagaland nung School Education department kübok school-tem tajungba küma yanglushitsü atema kanga süoki ia jembiba angashir. Atangji, Nagaland nunga government school ajakbo tamajung masü, karbo private school-tem dang nungi kiojena tajungba aser tesayua tajungba sayuba school-tema lir. Item government school-tem nungbo kaketshirtem masem adenshir. Item school-tem amaji government school ajak tajung kümdaktsüsü atema School Education department-i merangba angur. Ajisüaka, yakanü School Education department nung tokolakba Advisor aser Commisisoner nati anir tongti ketdangsertemi Naga nunger kaketshir telongjem tetsütitem nungi lenirtem ajurua shisalemsatepdang, Nagaland nung government school-tem tesadangka dang nungi teimba shibangyonga aotsü metetdaksüba den Naga nunger tesayurtem rongnung koba kin nungi tesayur teimba shima lir ta sükdanga sayuba tangatetbajibo tebilemtsü akoktsü meranger masü, tebilemtsü bendenlokba mapa-ang ka asütsü. Atangji, tangbo Nagaland government school-tem nung tesayurtemji züngdangra Ao kin nungi teimbabo masütsüa akok, saka küm semer lir jakdangbo, ashiko, Nagaland government school-tem nung tesayurtem rongnung tesadang kabo Aotsür Aor dang sür alitsüa akok, kechiyong iba mapangjibo Naga nunger tesayur inyaksüsa tazünger aikabo mali asü aser aliyonga shingai memetetba kintem dangi tetsüng agi tesayur inyaksü atema mounü. Atangji, tanüa aikati pei district alema tanga teküpbok tia nung aliba district-tem nung tesayur inyaksü asoshi mouner. Iba jagi government school-tem aika nung tesayur mali anungji tazünger mali, school kar nung class takdang dang nungi tesayur ishinba, ano school kar nungbo tazünger kata mali tesayurtem dang, ano talisa Kohima aser akhi Dimapur district asüba tesemtem nungbo school aika nung kaketshirtem dang nungi tesayurtem teimba angutsü. Tanü Nagaland nung government school majungba timtemji aji lir, anungji Dimapur aser Kohima nung talila aliba tesayurtemji Mon, Tuensang aser Shamator ama tesayurtem agi anüngba len jagi yokra aser kaketshirtem ishika aliba school-temjia shibangtsü melen tesayur shitak yoka jungjunga sayudaktsüra, government school-temji küm anasemka nung shitak küma shia arutsü. Ajisüaka, item teinyaktsütemji bilemdanga sentong yanglutsü melen tesayurtem rongnung koba Naga kin nungi tesayur teimba ta sükdanga, iba kin nem nübor tenzükba mapa nung nübo teimba agüja tenzükba asoshi tenüngsang agütsütsü melen, par kin nung jagibo joko taruba küm ishikabo tesayur meshimtsü amaika jembira, ibajibo tokolok langkoshishi alonger asütsü. Iba kolokji shitak küma memeyip tashi Nagaland nung government school-tem meyanglushitetsü. Atangji, pei tetsü oshi sayutsü asoshibo pei tetsü oshi metetba pei kin nungi shimtsüla saka tanga subject sayutsü atemabo kechi kin (?) ta masü, kechi tashi aser koma azüng (?) ta jungjunga tendanger külenang shimtsüla. Aji oda, jungra, Nagaland nung government school ajak nung tesayurtemji Naga kin ka nungi dang asüyonga kecha masü. Nagaland government school-tem ajungtsü asoshibo shibai sayur ta masü, koma sayur ta asübjiang tongtibang asütsü. Iba tangatetba nung Nagaland government school-tem yanglushitsü imlar.

## OLEMSABANG

### Tsüngrem o pei aginülen asaa meyipzüker benshiba

~ L. Kika Pongener.

*(Yashi adok nungi...)*

**Mathi-15:17-20.** Tebangi kechi ayir, aji tepoki yia metsümeshidak endoker...item yagi nisung memenentsür. Yisu-i iba o ashiba ya, Farise-temi pa nutsngtemi teka memetsüki chiyungba atema ashishia jembiba, iba o-ji langzua ashiba angur. Tanü putu nung Khristan tajung karibo iba laishiba tekong ya pei ajung asaa meyipzüker...Tebangi kechi ayir iba jagi nisung menentsür masü, anungji moko-sali achiba aser yi ajemba agi nisung memenendaktsür...ta bangbettsü ama jembir aser yamaji inyaka benshir. Yisu-i ashibaji...Teka memetsüki chiyungba agi nisung menentsür masü, saka kechi tebang nungi adoker aji temulongjang nungi adoker, aser ibajagi nisung menentsür ta ashiba lir. Kechiaser temulongjang nungi shisatsü tamajung, nisung tepsettsü, nuktapangta, japojar, auyatsü, tiyazü küli, Tsüngrem atalatsü adoker.

Laishibai ashir... "Chiyungtsü atema Tsüngremer mapa teraksadaktsüma. Chiyungtsü ajak atangji tajung lir ; Saka shibai kechi achir iba jagi metsüdaktsüra, pa asoshi aji temenen lir. Shi achiba sushia, yi ajemba sushia, aser kechi agisa ne adianu metsüdaktsür, itemji meinyaktsü junger" (Rom-14:20-21). Atangji, chiyungtsü koba agi tangar metsüdaktaktsür aji temenen lir. Ano laishibai ashir..."Saka atsüayunga chira pa aitsür, kechiaser pai tamang agi machir, aser kechisa tamang agi machir aser kechisa tamang agi masü aji temenen" (Rom-14:23). Anungji chiyungtsü kobasa tamang agi machir, item chiyungtsü ajakji temenen lir...ta laishibai ashir. Aji oda, chiyungtsü kobasa meshiteta sarasademer achitsü arentaker item chiyungtsü ajakji memeshiba chiyungtsütem lir. Moko-sali aser yi ya tamang agi asüngteta achiba/ajemba chiyungtsü masü, saka chidiyungdi chiyungtsütem lir, anungji itemji achiba aser ajembaji temenen-a ta angateter.

Anungji asenoki metetsümonga Tsüngrem o agi salep-sari masütsüla aser metetsümonga aibelen benshiba jagi pei sasa atakadem mebendenloktsüla. Tsüngrem o-i ashir, "Anungji memetetba mapangji Tsüngremi odang toktsü" (T.Mapa-17:30). "Kechiyong ochiba metetba ngur külen, asenoki metetjemer temenen benshira, ajangla temenentem indang tenla joko anunga mali" (Ibri-10:26). Anungji asenok temulong memeyipba mapang, memetetba mapang nung aibelenba-bo Tsüngremi odang toktsür, saka kodang asenoki ochibaji meteta kümdir, aser temenenji jangja-a meteta kümdir, iba sulenji aibelenra, ajibo joko temenen tatokba maka ta laishiba jagi ashir. Anungji asenoki Tsüngrem o agi salep-sari masütsüla aser metetsümonga aibelen meinyaktsüla. Tsüngrem o asen aginulen asaa meyipzüker benshibaji asen sasa atakadem bendenloker ta metetdi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## Laos nung Laishiba rongdoktsü aser Tenla ki bendoktsü



February 04, 2023 nü Laos nung Xonboursy district kübok Kaleum Vangke yimdak ketdangsertemi Buddhist nunger ayongsemer Tenla ki bendoktsüdang tangokba noksa nung angur.

**February 07, 2024:** Laos nung aliba yimtsüing ka nung sorkar ketdangsertemi Laishiba aika rongdoktsüba aser Amongnü tekülem sentong tagidak mapang Tenla ki bendoktsüba sülen Khristantemi tejashi lemsatopogo, ta osang ka ajanga metetdaksü.

February 04, 2023 nü Savannakhet province kübok Xonboursy district nung aliba Kaleum Vangke yimdak ketdangsertemi Buddhist nunger ayongsemer Tenla ki ka mita ao.

Iba tesem nungji Evangelical Christian kibongtem adenshia tekülem sentong agir. Ketdangsertem jagi Laishiba aser Khristan kakettem aika rongdoktsü aser house church ji bendoktsü, ta Khristantemi

metetdaksü.

"Amongnü anepdang 10:30 ako meta ketdangsertem arua house church bendoktsü," ta Khristan kati osangbener nem metetdaksü.

"Ketdangsertem den yimdak tongti, village security guards aser yimsüsürtem ajungbena arua onok tekülem ki raksatsü," ta kasa osang ajanga metetdaksü.

2019 küm Laos nung ozüing ka agizüka linük nung senso ajaki pei yimsü sadema bentshüsü atema temeden agüja liasü, ajisüaka communist linük nung Khristantem anema inyakba manener.

Laos ya Buddhist nütsüing teimba aliba linük ka lir, saka linük nung Khristan, Islam aser Baha'i yimsütema agizüker.

Khristan kati, "Parnoki

Khristan adianutem nem Tsüingrem mekülem daksüner. Onoki iba tatalokba osang district ketdangsertem nem metetdaksüogo," ta ashi.

2020 küm March ita nunga Kaleum Vangke yimdak Pastor Sithong Thippavong apuba sülen pa dang Khristan yimsü tokjang ta rongshia liasü, ajisüaka pai Khristan yimsü medoktsüba agi pa dang senchi Laos nunger Kips sen million 4 achi aser küm ka tepuokdak ayu.

Evangelical Khristan kati, "District aser provincial level nung party aser sorkari Tsüingrem dak amangtsü mesüra mamangtsü atema senso ajak nem temeden agütsür, ajisüaka yimtsüing level nungbo Khristantem anema inyaker," ta metetdaksü.

## Madhya Pradesh nung Khristan missionary tem osang bendener

**February 07, 2024:** Madhya Pradesh state nung police-i Khristan missionary tem osang tejangja bendentsü merangba atema Arogo lenirtemi aitsüogo.

Madhya Pradesh kübok Jabalpur nung Bishop Gerald Almeida-i, "Police-i onok reju kar nem 'questionnaire' agütsüogo, ajisüaka tang tashi nungbo onoki telangzüba magütsü," ta ashi.

Paisa, Madhya Pradesh nung Khristan missionary tem osang tejangja metettsü atema police-i Khristantem nem 'questionnaire' lema agütsüdar, ta metetdaksü.

February 7 nü osangbener den jembidang Gerald-i, "Kechiba Khristantem indang kija osang bendenerar ni memetet. Iba ya tebilemba kar yur inyaker asütsüa akok," ta ashi.

Police-i Khristantem nem agütsüba 'questionnaire' nung aliba tasüngdangbatemji missionary tem talidak, reju, mapa inyakba nükjidong, bank account aser bendanglen nungi fund anguba dak sendakba tasüngdangbatem lir.

missionary tem den külemi inyaker tem indang phone number aser melungtet telok lir asü maliar asüngdanga lir.

Questionnaire nungjisa Khristantemi tamangba yimsü meyidaksüba mapatem inyaker asü? ta asüngdanga lir. 2021 küm Madhya Pradesh nung BJP sorkari anti-conversion ozüing benoka lir.

Putir Gerald-isa, "Onoki item osang melemsadang tama legal tsütsü metetpelatsü, kechiyong police-i official mesüi item osang bendentsü meranger," ta ashi.

"Sensaker atema inyaker Khristantem sorkar amokmerenner ama reprangteter," ta pai ashi.

Yaküm July ita nunga Madhya Pradesh nung police-i Khristan missionary tem osang tejangja bendentsü meranga liasü, ajisüaka questionnaire ji prokshia osangbenertemi metetba sülen parnoki iba maparen anen. Tamalen prokba questionnaire nungji tasüngdangba 15 liasü saka tawa prokba questionnaire nungjibo tasüngdangba 30 lir. Dioceses asem- Jabalpur,

Jhabua aser Gwalior nung Arogo lenirtemi, 'Onok ket atongba questionnaire ji official masü' ta shiogo.

"Onoki anguba questionnaire ji official masü. Onok dang iba questionnaire nung aliba tasüngdangbatemji langzür parnok ket tongjang ta tuyu," ta Jhabua diocese nung public relations officer, Rockey Shah-i metetdaksü.

Paisa, "Arogo indang rejutemi sorkar nem item osang tejangja agütsütsü melunga dang lir, ajisüaka item questionnaire ji inyakym shidak ajanga arutsüla," ta ashi.

"Onoki ozüing alema kecha meinyaker. Linük anema onoki kecha meinyaker. Ajisüaka police-i mimshia questionnaire renemer agütsüba nungji melung malemstsüsa lir," ta paisa metetdaksü.

State sorkar mesüra police department-i Khristan missionary tem osang tejangja bendentsü atema official süa tuyua mali.

Nütsüing million 72 aliba state nung nütsüing shilem 0.29 dang Khristantem lir.

## ANOGO ABEN TSÜNGREM DEN

### Na tabensa kümdaktsü

*Aser techir süaka, pa timtem toushi anguba agi tashi angatsü angazük; aser pa tabensa kümdaktsür külen, Pa dang tashi angaba ajak asoshi pa tatem makaba tekümtet teyangluba aküm. Ibri 5:8-9*

Timtem nung tajung ka lir. Asenok ajaki timtem jenjang ka tashibo aremzüktettter, saka osangtajungji ya, ibai ajanga asenok Yisu mesüka kümdaktsür. Khrista mesüka nai aremzüksü mulunga lir asü? Timtem ajanga Tsüngremi ne taküm nung inyaksü langka lir. Yisu Tsüngrem chir temenen memenai liaka Tebui Pa jakdang yuja aliba timtem ajak aremzüker külen dang tabensa aküm. Pa ken timtemer külen dang, Pa tabensa aküm aser Pa ajanga alima tekümtet angutsü asoshi Pa Kümtetdakba aküm.

Nai ne taküm nung timtem maremzüktetra ne taküm nung shilem kar Tsüngrem nungi noktangadoker. Nai aji inyakra na kodanga tabensa makümtsü. Ne taküm nung shilem karibo timtem ajanga dang atongtsü akok. Na sayutsü asoshi Tsüngrem Tanelaji tongtipang lir. Pai tongtipang mapatem ne dang sayutsü lir, saka nai itemji tatitangba ajanga dang angazüktsü akok.

Timtem majangi dang Saul Chuba kümdaktsü, saka Tsüngremi nüngloktsüba mapa nung Pai Pa jakla tashi küma kodang melenshi. Dawid küm aika timtem aser shisabulu nung liasü. Kodang pa chuba mendeni atu Tsüngrem mulungjang anasa aliba pa aküm.

Tsüngremi ne nem agütsüba timtem tezüdok. Mapa tasak paitoktsü dang telemtetba telemtet. Tsüngremi Pa chir wazüka mayu. Pai asenok wazüka ayutsü koda yimlatsü? Kodang nai timtem ajurur, tashi angatsü angazükang.

## Tang Asia nung Khristan nütsüing million 415 lir

**February 07, 2024:** Tawa Center for Study of Global Christianity-i report ka ajanga, alima nung Khristan nütsüing kanga kera renlokba tesemji Asia lir ta metetdaksüogo, ta International Christian Concern (ICC)-i metetdaksü.

Tang Asia nung Khristan nütsüing million 415 dak tema lir, ta kasa report ajanga metetdaksü.

2020 küm nungi tenzüka Asia nung Khristan nütsüing renlokba shilem 2.11 lir; Asia kübok tesem aika nung K h r i s t a n t e m reshikangshiyonga Khristan nütsüing kanga kera renlokba ya osangtajung ka lir, ta Center for Study of Global Christianity-i metetdaksü.

Kasa report ajanga, Africa nung Khristan million 734 lir aser iba continent nung Khristan nütsüing renlokba shilem 2.6 dak tema lir, ta metetdaksü.

Alima nung Tsüngrem dak mamangertem nütsüing tera ajema kümogo; 2020 küm

Tsüngrem dak mamanger million 147 liasü saka 2024 küm tashi nungbo alima nung Tsüngrem dak mamanger million 146 dang kümogo, ta report nung shia lir.

Khristan nütsüing kera renlokba denomination ji Evangelical aser Pentecostal denominations na lir; 2050 küm tashi nungbo alima nung Pentecost nütsüing billion 1 dak tema asütsü.

2020 küm missionary 420,000 alima tesem balalai yoka liasü aser 2024 küm tashi nungbo missionary 445,000 akümtsü imlar, ta parnokisa metetdaksü.

2024 küm alima nung Khrista osangtajung mangashir nütsüing shilem 28 shi asütsü; 1900 küm tashi nung alima nung Khrista osangtajung mangashir nütsüing shilem 54 liasü.

2024 küm America nunger Khristantemi mission mapa balala atema dollar sen trillion 1.3 shi tenla agütsütsü ta asadangtetogo, ta parnokisa metetdaksü.



**AO OSHI ANGAZÜKDAK:**

**TANÜ ANGAZÜKTSÜBA OJANG**



Shitet

(v) shimtet ( choose and pick)

\* Chubalai dokan nung tsüngsem tajung ka shitet.

Shiti

(n) Arem shiruru tulutiba, tepo talang aketba arem shiruru tulu (elephant)

\* Nisungi shiti kanga junga azüoka amshir.

**OLONG PAITEP # 6691**

1		2		3		4	5		
			6						7
	8								
9			10		11				
			12					13	
					14				
16					17				

**TIPIEN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S \_\_\_ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

**OLONG PAITEP # 6690 TELANGZÜBA**


**TIPIEN :**

- 2. Bangsemo, 6. Tiptem,
- 8. Jen, 9. Talila, 11. Aren,
- 12. Tzübo, 14. Alia, 16. Angati,
- 17. Odi, 18. Azü, 19. Sünglang.

**LANGTSÜNGLEN :**

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong,
- 13. Ajizük, 14. Aitsü, 15. Tasa,
- 16. Aina.

**NAI-A YA METETTER MA**



**Jamsetji Tata nem World's Most Generous Individual naroküm agütsüogo aser pai Mukesh Ambani, Ratan Tata, Azim Premji aser Shiv Nadar nunger ajatetogo. Jamsetji Tata ya Tata Group tenzüksang lir aser pai Rs 829,734 crore tashi tenla agütsü. Jamsetji Tata-i 1892 nungi tangar yaritsü tenzük aser pai education aser healthcare nung temulung agütsü. Pa 1904 küm asüba sülen Ratan Tata-i tebu senmang agizüka beshia arur. Ratan ya Tata Group nung Chairman Emeritus lir aser pai lokti asoshi tenzükba wadang ketdangsüa repranger.**

**Meghalaya CM-i Wah Umkrah riverfront development project lung azüngtsü**



Shillong, February 7, 2024

(Agencies): Meghalaya Chief Minister Conrad K. Sangma-i Wah Umkrah River nung riverfront development project atema lung azüngtsüogo.

Iba mapatong nung Rs 39 crore endoka yanglutsü aser Wah Umkrah River melenshitsuä water pollution khuret azüoktsü.

Tesüba nung Wah Umkrah ya tobur tajung ka liasü aser Shillong nung kiyong aika kongshia liasü saka nütsüng yongsük teimba akümba ajanga ayongküm kanga mejungi kümogo.

Wah Umkrah Riverfront Development Project ajanga iba tesem ya recreational, cultural aser social asoshi central hub

kümdaktsütsü.

Iba Project ajanga ayong merüktetba dang masü saka modern amenities densesmsü.

"Wah Umkrah ayong ya Shillong nung kiyong aika ajanga ayimer anungji sensotemi iba mapatong takok ngudaktsütsü atema amalitepa yariteptsü ayongzüker" ta CM Sangma-i metetdaktsü.

**PM Modi-i aiben Assam semdangtsü: Himanta Biswa Sarma**

Guwahati, February 7, 2024

(Agencies): Prime Minister Narendra Modi-i Lok Sabha elections magidang Assam aiben semdangtsü ta Assam Chief Minister Himanta Biswa Sarma-i ashi.

Assam sorkari Lakhimpur nung Prime Minister indang rally ka atema tesem bushir ta medi nung prokshiba sülen Chief Minister Sarma-i iba osang metetdaktsü.

PM Modi-i election magidang

pezüben mesüra punguben semdangtsü. State sorkari rally agitsüba tesem kar bushir ta CM Sarma-isa ashi.

"Prime Minister-i election mapang tesem balala semdangtsü. Onoki rally agitsüba tesem pezü-pungu ka reprangdangogo ajisüaka ano lemtet magi lir. Onoki Jorhat nung Teok, Lakhimpur, Nalbari aser Silchar nung sendentem amentsü bilemdangogo saka

mapang tonga arudang sentongtem renemtsü" ta paisa metetdaktsü.

February 4 nü PM Modi-i Guwahati nung lokti sentong ka nung jemi aser idangji terenlok mapatong aika atema lung azüngtsüogo.

Lok Sabha elections agitsü ita ana jakdang Prime Minister den Home Minister Amit Shah aser tanga BJP lennirtemi Assam aser Northeast semdangtsü imlar.

**PUBLIC NOTICE**



Regd. Office: ICICI Bank Limited, Landmark, Race Course Circle, Vadodara- 390007  
Corporate Office: ICICI Bank Towers, Bandra- Kurla Complex, Bandra (E), Mumbai- 400051

Branch Office: ICICI Bank Ltd Ground Floor Shanti Complex, G.S. Road, Bhangagarh, Guwahati, Assam- 781005

Sen apurtemi Bank nungi loans facility agiba dak sendakba nung sentong aser tetemlok narpongla magütsü aser iba loan ya Non Performing Assets (NPA) kümtsüba osang metetdaktsür. Section 13 (2) of Securitisation and Re-construction of Financial Assets and Enforcement of Security Interest Act-2002 dak ajemdaker iba osang ya parnoki bank nem agüja aliba address temi yokogo aser iba den bendenloksema sen apurtem nem iba sangdong ajanga iba osang agütsür.

Sr. No.	Name of the Borrower/ Co-Borrower/ Guarantor/ (Loan Account Number) & Address	Description of Secured Asset to be Enforced	Date of Notice Sent/ Outstanding as on Date of Notice	NPA Date
1.	LAKOH00040983800/ Vijay Kumar Mandal/ Kapil Dev Mandal/ House No.573/ Mobile Shop Station/ Headquarters Jakhama/ Kohima- 797005	VITARA BREZZA/ VITARA BREZZA/ NL01P9352	26-Nov-23 Rs. 3,96,920/-	11-May-2023
2.	LAKOH00043199184/ Vijay Kumar Mandal/ Kapil Dev Mandal/ House No.573/ Mobile Shop Station/ Headquarters Jakhama/ Kohima- 797005	Vitara Brezza/ VITARA BREZZA/ NL01CA3876	26-Nov-23 Rs. 71,57,88/-	11-May-2023
3.	LAKOH00044251240/ Vijay Kumar Mandal/ Kapil Dev Mandal/ House No.573/ Mobile Shop Station/ Headquarters Jakhama/ Kohima- 797005	ALTO/ ALTO/ NL01CA2825	26-Nov-23 Rs. 3,58,991/-	11-May-2023
4.	LAKOH00045832924/ Vijay Kumar Mandal/ Kapil Dev Mandal/ House No.573/ Mobile Shop Station/ Headquarters Jakhama/ Kohima- 797005	Bolero/ BOLERO/ NL01CA4594	26-Nov-23 Rs. 9,66,752/-	11-May-2023
5.	LAZDU00042546716/ Sanjay Gupta/ H No.85/ Nst Colony/ Dimapur, Nagaland/ Dimapur- 797112	Verna/ 1.5 S PETROL/ NL07CA8284	29-Nov-23 Rs. 8,19,843/-	20-Dec-2022
6.	LAKOH00041007369/ Keneihetuo Hibo/ Sebu Hibo/ Cen-38 (2)/ Industries Office Road/ Kohima/ Kohima- 797001	WAGON R/ ZXI 1.2L/ Wagon R 1.0/ NL01P9068	03-Jul-23 Rs. 4,36,604.42/-	03-Jan-2022

Temalen shisema aliba sen apur aser guarantors (where ever applicable) tem dang osang U/s agütsüba sülen anogo 60 tsüngda parnoki sen apua aliba aotsü metetdaktsü. Notice U/s, 13 (2) agütsüba sülen atakzükja aliba anogo 60 tsüngda sentsüh maotetra Securitisation and Re-construction of Financial Assets and Enforcement of Security Interest Act, 2002 dak ajemdaker maneni tenüngdakba jenjang balala agitsü.

Date : February 08, 2024  
Place : Kohima & Dimapur

Sd/- Authorised Officer  
For ICICI Bank Ltd.,

**GOVERNMENT OF NAGALAND  
DIRECTORATE OF SCHOOL EDUCATION  
NAGALAND : KOHIMA**

NO. ED/EST-1/GT-ADVT/2022/817

Kohima, the 7th February, 2024

**REMINDER NOTICE**

The following candidates have not yet submitted acceptance of offer of appointment to the post of Graduate Teacher (Hindi) in response to this Office Notification of even number dated 14th December 2023.

- 1. Shri Jaham Difoesa
- 2. Shri Veerendra Sahu

In case of non receipt of acceptance of offer of appointment from the above candidates within 7 days from the date of publication of this Reminder Notice, candidates placed in the Waiting List will be offered appointment in order of merit. No claims will be entertained after the expiry of the grace period granted.

(THAVASELAN K) IAS  
Principal Director.



## Pakistan nung bomb ana apok, nisung 22 asü



**Quetta, Tsüklai/February 07 (Agencies):** Pakistan southwest tsütsü Balochistan province nung bomb ana apokba lendong nung nisung 22 asü aser 40 dak tema yiru.

Election agitsü anogo k alia Bodhbarnü bomb ana ya apoker. Bomb ana ya anisüngzük makaba region nung political party balala indang election office tem nung tenük yoker amakba liasü.

Bomb mezüngbuba ya Afghanistan den arütsü anasa Pishin district kübok independent election candidate Asfandyar Khan Kakar indang office nung pokloktsü ta police temi ashi, kong nisung 12 asü.

Tanabuba bomb ya Jamiat Ulema Islam (JUI) indang office anasa Qilla Saifullah nung apok. JUI ya tamangba yimsü nung ajemdakba party ka lir aser taoba mapanga iba party dak tenük yoker lendong agüja liasü ta iba province indang information minister-i ashi.

Pishin district indang deputy commissioner Jumma

Dad Khan-i ashiba agi, iba bomb lendong nung nisung aika yiru. Nisung kar kanga sashia yirur kumzüktsü teimla kangabo mali, ta Khanozai Hospital nung medical superintendent-i osangbener dang ashi.

Qilla Saifullah lendong nung nisung ter asü, ta Balochistan indang caretaker information minister Jan Achakzai-i ashi.

Pishin nungya improvised explosive device (IED) ka motorcycle nung inoker pokdaktsü ta paisa ashi.

Pakistan nung Brehostibarnü election agitsü renemshiba mapang iba lendong asoshi telok katia tenüng agia mali aser iba ama lendong tali atalokba angashir.

Iba ama bomb pokloktsüba yagi security asoshi shisabolur aser ketdangsürtemi polling booths nung security tashi itshitsü shia lir.

Tawa azüdokshi tali akumba sülen iba amala lendong nungi kumzüktsü mechi police aser paramilitary forces züngsem meyirijang aika Pakistan tesem

balala nung yoka lir.

Separatist Balochistan Liberation Army (BLA) temi tawa-tanü iba ama lendong tali agütsür.

Taoba hopta Balochistan yimtiba, Quetta nungi mile 40 shi pilar aliba Mach yimti nung BLA teloki mitkar aliba tesem ka amak aser iba mapang nisung 15 asü.

Tesunep maliba iba region ya Iran aser Afghanistan den arütsüa lir aser yangi copper, zinc aser natural gas jenti lir.

Brehostibarnü election nung azüdokshi ataloktsü tetsübo nung Balochistan Information Minister Jan Achakzai-i election anogo internet service shibanga atatsü ta Deobar aonung sangdonga liasü.

Ano Pakistan northwest tsütsü Khyber Pakhtunkhwa nunga security tsütsü lendong timtem tali ajurur, kong Tehreek-e-Taliban Pakistan (TPJ) teloki azüdokshi mapa tali inyaker.

Hombarnü police ter tepsetba atema iba telok yagi tenüng agia liasü.

## Philippines nung hon atudak yimtsüng ka anenbang

**Manila, Tsüklai/February 7 (Agencies):** Philippines Anüolen tiplen anentsüh tesashi ka alua hon atudak yimtsüng ka nung bus aser kitem anenbangba sülen teküzmükertemi samar alirtem bushiba mapang ka lir.

Tzünglu kanga sashia aruba sülen tenem ka anenzüka alua Mindanao nung Davao de Oro province kübok kinük nung aliba yimtsüng ka anenbang aser nisung poung tashi asüba osang metetdaktsüogo. Iba lendong nung ano nisung 31 yiru aser nisung asembo helicopter amshia aninogo.

Manila nungi Al Jazeera osangbener Barnaby Lo-i ashiba agi, military indang Eastern Mindanao Command-i nisung 41 samar tang tashi mongutet aliba indang osang agütsüogo. Lendong nung nisung 45 kumzükogo, shirnok hon aturtem timba liasü. Parnok ya bus ana nung mener liasü.

"Lenmang tensenzü majung

kümogo aser iba tesem nung cellphone signal makai kümogo," ta military-i Facebook ajanga Bodhbarnü metetdaktsü.

Provincial sorkar otongdar Edward Macapili-i ashiba agi, anentsüh agi Masara yimtsüng kongshiba mapang nisung kwi pei kidang sabang, iba indang osang tejangja memeteti lir.

Lishi nungi nisung pongu tasü mangbo agitotogo, ta Macapili-i ashi. Ajisüaka item nisungtem ya bus nung mena alirtem asü masü mejangja, ta paisa shisem.

Pai ashiba agi, mine anasa anena aliba Philippine company Apex Mining indang bus ana nung ya nisung 28 mapa nungi kidangi anir oya liasü, ta AFP news agency-i metetdaktsü. Bus nung mena alir hon aturtem parnok ti anentsüh agi bus manenbang tsüngda jokzuka luadok.

Army, police aser nüburtem Mongolbar aonung kanga mangatokba ajanga

teküzmükba maparen anenadok, kechiyong ano anentsüh alutsü ta tsüba bilema liasü. Teküzmükba maparen Bodhbar anepdang tenzükogo.

"Tesangwa peria maliba aser anentsüh terara aluba ajanga inyakyim nung tetsükdaktsü adoker," ta Apex Mining-i ashi.

Philippines nung anentsüh mapangshia alur, kechiyong linük nung tenem aika lir aser tzünglu kanga sashia aruba den süngtong leprepa aoba ajanga anentsüh lendong kanga bulur.

Anentsüh agi kongshir aliba tesem anasa yimdaklir 600 shi alir aser parnok ajak tanga tesemi aninogo.

Hopta ishika tsüngda tüzümsüng aruba aser anentsüh aluba ajanga yimdaklir 10 dak tema taküm samaogo, ta disaster response ketdangsürtemi metetdaktsü. Tzünglu kanga aruba ajanga nisung meyirejang aika tejenokdak bushia jenshiaogo.

## ALI TAYOKTSÜ LIR

At Aoyim Village (middle of the village) near 4th Mile, Chümoukedima @300 per sq.ft. (negotiable) No broker, any size land available.

Contact : 8974754265 / 8787392096

## Gaza rara indang jembishinütsü Blinken Israel nung lir

**Jerusalem, Tsüklai/February 07 (Agencies):** Gaza nung rara anena atatsü asoshi tezüngzüktep ka yanglutsü meranga United States Secretary of State Antony Blinken Israel nung arua lir.

Hamas aser Israel tsüngta yimjung ken o jembiba linük Egypt aser Qatar nung Mongulbarnü senden amenba sülen Blinken ya Bodhbarnü Jerusalem tonga aru, aser ibai taoba küm October ita rara tenzükter iba region ponguben buba semdang alitsü.

Tezüngzüktep ka benokdangba nung Palestine nung telok, Hamas-i telangzüba agütsüba indang jembitsü atema pai Israel Ato Kilonser Benjamin Netanyahu aser Tir Isaac Herzog ajurutsü.

Kechi tezüngzüktep südir süaka rara anentsü tejangja alitsüla ta Hamas-i taoba mapang shia liasü. Ajisüaka Israel-i Hamas mesamatsü tashi rara ya teti atema manentsü ta ashir.

Palestine nung Hamas teloki Mongulbarnü sangdong ka nung, parnok iba ceasefire deal ya tangatetba tajung nung asadangogo ta ashi, kong nüburtem nem teyari aser tejenokdak agütsütsü, Gaza tanaben yanglushitsü küm 17 junga amakba anentsü aser tepuokdak alirtem melentepba

maparen tembangtsü dena lir.

Bodhbarnü Hamas-ia pari aginüba sentong agütsüogo ta ashi. Iba sentong nungya ceasefire plan telemsa asem lir aser iba mapang parnok October 7 nung apuba Israel nung aser Palestine nung tepuokdak alirtem melentepstü, Gaza tanaben yanglushitsü, Israel sepai ajunga ainshitsü aser nisung tasü mang melentepstü dena lir.

Hamas indang political bureau nung lenir Mohammad Nazzal-i ashiba agi, iba counterproposal nungya ceasefire atema anogo telatet tejangja lir, koba mezüng benokba nung shia mali.

"Item ya kata nunga atsü-anem makatsü. Israel nungeri nisung tepsetba ya anentsüla. Gaza Strip nungi Israeli occupation forces teti asoshi ainshiba onok tenük agi nguner. Onok telangzüba ya asangsang aser onoki meshiba ya tejangja lir."

Hamas teloki October 7 nü Israel south tsütsü amakdang nisung 1,300 tepseter ano nisung 250 shi pua bener aoba mechi Gaza nung rara ya tenzük.

Iba sülen tang tashinung nisung 27,500 dak tema Gaza nung tepsetogo, ta Gaza Strip nung aliba health ministry ajanga ashir.

## Russia-i Ukraine amakdang nisung pongu asü

**Kyiv, Tsüklai/February 7 (Agencies):** Russia-i Bodhbar anepdang missile aser drone amshia Ukraine kübok yimti balala amaakba sülen nisung pongu süogo aser aika yiruogo, ta Ukraine nung ketdangsürtemi metetdaktsü.

Kiv kübok Holosiyivsky district nung nisung aliba ki ka dak kongshiba sülen nisung pezü süogo.

Ano Mykolaiv yimti nunga nisung ka süogo, ta ketdangsürtemi metetdaktsü.

Linük ajunga nung air alert agütsü aser Poland den arrtsü nung aliba Lviv yimti tashi tonga oa amakba osang angazükogo.

Ukraine indang commander-in-chief Valerii Zaluzhnyi-i ashiba agi, Russia-i missile aser drone 64 amshia amak aser item rongnungi 44 bo nokdangogo. Ukrainian air force-i ashiba agi, Russia indang cruise missile tem ya Lviv, Ternopil aser Ivano-Frankivsk kolak nunga puteta liasü.

Ukraine Tir Volodymyr Zelensky-i mezüngbo nisung ana asüba osang metetdakja liasü. Iba sülen ano 18ben

atongtepa yanglur aliba ki ka nung nisung kar sür aliba nguteta liasü.

Kyiv Mayor Vitali Klitschko-i ashiba agi, sepaitemi khazüka yokba Russia nung indang missile kati power line raksatsüogo aser linük yimtiba nung ki kar nungbo electricity maka kümogo.

Mykolaiv nung nisung ka yirur mozükidangi anir ao, ajisüaka pa kanga mejungi yirur aliba ajanga süatok, ta yimti mayor Oleksandr Senkevich-i ashi.

Lendong nung yirur alirtem lendong atalokba tesem nung temang anepaluja liasü. Missile tem ajanga ki, gas line aser tzü supply line raksatsüogo, ta paisa shisem.

Kharkiv yimti nunga bomb apokba ola angashiogo aser yimti nung infrastructure kar raksaba military-i metetdaktsüogo.

2022 küm February 24 nü nungi tenzuka Russia-i Ukraine kübok tesem balala anung ajanga maka arudar. Russia nung sepaitemi drone aser missile tem densema hadir balala amshia arudar.



## Kezhaseluo-o Pienyü-i NASA wrestling championship kokogo



**Kohima, Tsüklai/February 7 (TYO):** Bodhbarnü 65buba Northern Angami Sports Association (NASA) Wrestling asayamung nung Kezhaseluo-o Pienyü-i final asaya koka pa maneni champion kümogo. Iba asayamung ya Kohima Village Ground, Ziekezou nung asaya liasü.

Final asaya nung Kohima yimtsüng nungi arishi küm 25 tain Kezhaseluo-o Pienyü-i Kohima yimtsüng nungisa taoba mapang champion Menuosetuo Yiese koka liasü.

Pienyü ya NASA Group-A nungi asayar aser pai taküm agi küm anabuba atonga iba championship kokogo.

Ano Kohima yimtsüng nungi Vizakietuo Suohu aser Neizosetuo Kire na tasembuba aser pezübuba nung tembanga liasü.

Wrestling asaya akoksang Pienyü nem senpet sen lakh 1 aser NASA wrestling champion belt agütsü aser tanungba takoker asem nem senpet sen 80,000, 60,000 aser 40,000 agütsüogo.

Quarter final nung tamakok angur Kevisier Dzüvichü, Vaphizo Rutsa Mharavizo Kesiezie (asemprongla Kohima yimtsüng nungi) aser NASA Group C, Nerhema yimtsüng nungi Khrielabeituo Semou nung nem senpet sen

5,000 (asayar shia nem) agüja liasü.

Bodhbarnü anepdang mezüngbuba sentong nung Special Assistant to Nagaland Chief Minister, Vibeilietuo Kets alakteta jaoker liasü aser asayamung shibangba sentong nung Northern Angami Public Organisation Tir Keduo-o Zumu tetushi tejaoker liasü aser pai takokertem nem senpet agüja liasü.

NASA nung yimtsüng 29 lir aser yimtsüngtem ya telok pezü küma lemsar asayar, kong telok shia nungi wrestler 15-i shilem agir aser ajak senteper wrestler 60 iba championship nung tokteper.

## Egypt-i coach aser team director asütsü atema jakrep Hossam aser Ibrahim na shimogo



**Tsüklai/February 7, 2024 (Agencies):** Egypt-i national football team coach aser team director mapa abentsü atema jakrep, Hossam Hassan aser Ibrahim Hassan na shimogo.

Egyptian Football Association-i Mongolbarnü ashiba agi, linük nungi goal timtiba (68) idaktsüba asayar Hossam Hassan-i Portugal nung coach Rui Vitória melentsü, shiba Africa Cup of Nations nung team-i junga masayatetba sülen Deobarnü mapa nungi anentsüogo.

Egypt-i otsü tasen ka yanglua Africa Cup ya tenetben koka lir, ajisüaka iba asayamung 34buba nung parnoki asaya ka danga makok aser round of 16

nung penalty metsütepba sülen parnok Congo-i tsükdakja liasü.

Forward ka ama Cairo nung asosang Hossam Hassan-i teyari agüja Egypt-i iba asayamung ya asemben kokogo. Pa mapang talangbaka Cairo club Al Ahly nungi asaya aser iba den pa Greece nung PAOK aser Swiss team Neuchâtel Xamax nungia asayaogo. Pa 2008 küm asaya nungi manen tsüngda Egypt nung tanga club nungia asayaogo.

Iba süleen pa Egypt nung club balala aser Jordan national team coach mapa inyakogo.

Kasa mapang nung Ibrahim Hassan, shiba taoba mapang defender ka liasü, pa-a Egypt

team nungi asayaogo aser iba den pa adianu den Egypt indang club balala nungi asayaogo.

Egyptian federation-i ashiba agi, Vitória melena parnoki bendanger coach ka bushidar. France nung coach Herve Renard-i iba mapa belenzütsü akok ta jembia liasü.

Vitória shiba küm pezü atema 2022 küm Egypt indang coach asütsü shima liasü, pai team takok dangi manitet. Taküm AFCON nung Egypt team-i Mozambique, Ghana aser Cape Verde den asayaba mapang goal 2-2 agüja kasasa nung tembang aser tatem nung Congo mekoki liasü.

Kasa mapang nung group asaya tanabuba nung Ghana den asayaba mapang Mohamed Salah hamstring yiruba aser No. 1 goalkeeper Mohamed El Shenawy Cape Verde den tasembuba group stage game asayaba mapang tapu yiruba ajanga team jenjang mejungi aküm.

Ajisüaka reserve goalkeeper Mohamed Abou Gabal, shiba taoba asayamung nungbo ball aika kümzüka Egypt team takok dangi ani, pai Congo den penalty metsütepba mapang cross bar nung ball metsüoktsüba ajanga parnoki asaya mekoki liasü.

## Rafael, Novak, Carlos nunger '6 Kings Slam' nung asayatsü

**Tsüklai/February 7, 2024 (Agencies):** Rafael Nadal, Novak Djokovic, Carlos Alcaraz aser Australian Open champion tasenba Jannik Sinner nung October ita Saudi Arabia nung exhibition asayamung ka nung shilem agütsü.

Daniil Medvedev aser Holger Rune nata Riyadh nung iba asayamung koba dang "6 Kings Slam" ta ajar iba asayamung nung shilem agütsü.

Rune dak alak iba asayamung nung shilem agütsüpur ajaki Grand Slam kakabosa kokogo. Djokovic-i tang tashi nung Grand Slam 24 koka tebur tem rongnungi record yanglur lir aser pa sülen Nadal-i GS 22 koka pa tanabuba jenjang nung lir. Alcaraz-i Grand Slam ana koka lir aser Sinner o Medvedev natia koka lir.

Kasa mapang nung Nadal ya tawa Saudi Tennis Federation indang ambassador

asütsü shimba sangdongogo.

Rights teloktemi ashiba agi, iba chuba yimli nung tetsürtem maneni mezüngmeshia amshir aser homosexuality ya kanga ashibanger, koba Middle East nung linük timba ka nung kanga ashibanger.

2018 küm Washington Post columnist Jamal Khashoggi tepsetba sülen Saudi Crown Prince Mohammed bin Salman-i, pa alima kintemi sentoker aliba melenshitsu asoshi inyaka arudar. Paisa, Saudi Arabia indang rongsenketzüng totzü dak dang memetaloki tanga nunga ajungkettsü meranga arudar.

ATP men's tour nung tatembangbuba asayamung kong temaba jenjang nung aliba tebur asayartem asayar iba asayamung ya Jeddah nung asayatsü aser WTA women's tour nung tatembangbub asayamung-a Saudi Arabia nung asayatsü atema sensaksemendar.

## Test bowling rankings: Bumrah temaba jenjangi tuogo



Arishi küm 30 tain Bumrah shibai, Test asaya 34 nung wicket pongungu terben tashi agiaka tang tashi nung Test rankings nung jenjang asemubaba adena tudanga mali, pa tang mezüngbuba temaba jenjangi tuogo.

Bumrah-i 2024 küm Test asaya ana tashi nung wicket pongungu agir lir. Taküm küm tetenzüklen Cape Town nung asayaba mapang pai run 61 agütsür wicket pongu agia liasü. England den asayaba mapanga pai innings ka nung run 45 agütsür wicket 6 agia liasü.

Bumrah ya India nung bowler tem rongnung temaba jenjangi atuba asayar pezübuba dang lir aser fast bowler tem rongnung Test rankings nung temaba jenjang tongtetba mezüngbubaa asayar lir. Ashwin, Ravindra Jadeja aser Bishan Bedi nungeria Test rankings nung temaba jenjang tongtetogo.

ICC rankings nung Bumrah dang tejakdangi atu masü saka pa indang teammate Yashasvi Jaiswal-a tejakdangi tuogo. Pai England den Vizag nung tanabuba Test asayaba mapang mezüngbuba innings nung double century ka yanglua liasü.

Jaiswal-i run 209 yanglua team-i asaya akokba nung teyari tulu agüja liasü. Test batsmen rankings nung Jaiswal jenjang 37 tejakdangi tua tang 29buba nung lir. Batsmen tem rongnung New Zealand nung asayar Kane Williamson maneni temaba jenjang nung lir.

**New Delhi, Tsüklai/February 7 (Agencies):** India nung fast bowler Jasprit Bumrah tawa sayaba ICC Men's Test Bowler rankings nung temaba jenjangi tuogo.

International Cricket Council (ICC) sangdong ka ajanga ashiba agi, England den Vizag nung tanabuba Tset asayaba mapang run 91 agütsür wicket 9 agiba sülen Bumrah tang mezüngbuba ICC Test bowling rankings nung temaba jenjangi tuogo.

Tanabuba Test nung wicket 9 agiba sülen Bumrah nem Player of the Match naroküm agüja liasü. Pa taoba ICC Test rankings nunga jenjang asem tejakdangi tua teammate Ravichandran Ashwin ajateta liasü.

New Zealand nung South Africa pur Test asaya nung masaya-aka South Africa nung pacer Kagiso Rabada Test bowler tem rongnung maneni tanabuba jenjang nung lir.

Ashwin shiba taoba küm March ita nungi temaba jenjang nung liasü, pai India aser England na asaya nung wicket asem dang agi aser pa jenjang ana asepzüka lua tang tasembuba nung lir.

## BILEMDANGANG

"Tia tensa ajak nung süngjema alitsü merangang."